

ԱՌԱՋԱԲԱՆ

Պատմահայր Մովսես Խորենացու հավաստմամբ, հնագույն ժամանակներում Գուգարաց աշխարհը եղել է Հայկ Նահապետի գարմից սերող Շարայի որդի Գուշարի տիրույթը: Տարածքի հնագիտական հետազոտությունները վկայում են, որ այստեղ կյանքը գոյատևել է քարեդարյան ժամանակներից ի վեր. քանի առկա էին նպաստավոր պայմաններ՝ Դեբեդի և Ձորագետի խորունկ կիրճերի դժվարամատչելի քարանձավային կացարաններ, զովասուն և առողջարար կլիմա, քաղցրահամ աղբյուրներ, ձկներով հարուստ գետակներ, պտղավետ անտառներ, վայրի անասնահոտեր, թռչունների երամներ ու ձիերի երամակներ. սիզավետ արոտավայրեր: Նոյեմբերյանում, Վանաձորում, Լոռի բերդում, Շնողում, Ախթալայում, Սանահնում, Շամլուղում, Օծունում, Յաղդանում, Ստեփանավանում և այլուր ի հայտ եկած քարե, փայտե, խեցե, ոսկրի և մետաղի իրերն ու առարկաները, բրոնզե արձանիկները, գարդերը, զենքերը, գործիքները, որոնք ունեն չորս հազար տարվա վաղեմություն, արտացոլում են տեղաբնակների առնչությունները Հայկական լեռնաշխարհի հետ, զբաղմունքը, սովորույթները, պատկերացումների համակարգը, ծիսական նախասիրությունները:¹ Բրոնզի և երկաթի բազմապիսի գտածոներն անսքող վկայում են ինչպես վաղ, այնպես էլ Արարատյան թագավորության կազմում ձեռք բերած մշակութային նվաճումներն ու դամբարանային ճարտարապետության բարձր մակարդակը, երկրագործության ու արհեստագործության վերելքը:

Գուգարքը հաղորդակցվել է նաև հելլենիստական մշակույթին, որը փաստվում է դամբարաններից մեկում գտնված մայր աստվածուհու քարե կիսանդրիով՝ այլ նութերի գուգարությամբ:

Ստրաբոնի և Խորենացու հաղորդումների համաձայն, Վաղարշակ թագավորը (մ.թ.ա. 148-127 թթ.) Գուգարքում կազմակերպում է սահմանապահ բղեշխություն՝ Մեծ Հայքի 13-րդ նահանգի 9 գավառներով: Բավականին ընդարձակ այս միավորումը արևելքից սահմանակից էր Ուտիքին, արևմուտքից՝ Տայքին, հյուսիսից՝ Վիրքին և հարավից՝ Այրարատին: Ներկայումս Հայաստանի կազմի մեջ են այդ նահանգի 3 գավառները միայն՝ Տաշիրը, Ձորափորը և Կողբոփորը: Ստեփանավանի և Տաշիրի շրջաններն ընդգրկում են Վերին Տաշիրի սարահարթը, Գուգարքի և Սպիտակի վարչական միավորները՝ Փամբակի ցածրադիր հովիտը, Թումանյանը՝ Ձորագետը, Նոյեմբերյանը՝ Կողբոփորը: Վարչական այս բաժանումը պահպանվել է Արտաշեսյանների (մ.թ.ա. 189 – մ.թ. 1) և Արշակունիների (62-428 թթ.) օրոք, չնայած 387 թ. Հռոմի ու Պարսկաստանի միջև կնքված դաշնագրով կատարված մասնակի փոփոխություններին: Տարածքային ամբողջականությունը պահպանվեց նաև մարզպանական շրջանում, թեև քսանամյա պատերազմներից հետո 591 թ. պարսկա-բյուզանդական պայմանագրով մի կարճ ժամանակ ջլատվեց նահանգի միասնությունը:

¹ Խնդրի վերաբերյալ գիտական հարուստ տեղեկություններ կարելի է քաղել հնագետներ Ստեփան Եսայանի, Էմմա Խանգադյանի, Սեդա Դևեճյանի, Վարշամ Ավետյանի, անծավագետ Էդիկ Սարգսյանի աշխատություններից:

Շուրջ յոթ դար Գուգարքը² նշանակալի նպաստ է բերել երկրի քաղաքական ու տնտեսական կյանքին, ակտիվորեն մասնակցել է V դ. ազգային-ազատագրական շարժումներին: IV դարում քրիստոնեություն ընդունելոց հետո, նահանգի ողջ տարածքում կառուցվում են նոր սուրբատներ, որոնցից պահպանվում են երեք կողմից սյունասրահներով ներկաված Տորմակադան և Օծունի տաճարները, խաչաձև հատակագծով կենտրոնազմբեք փոքր եկեղեցիները Դորբանդում, Արջովտում, Ոսկեպարում, որոնք ուրույն հետաքրքրություն են ներկայացնում IV-VII դդ. ոչ միայն հայկական ճարտարապետության անդաստանում:

Այս դարաշրջանից մեզ հասած քառանիստ կոթողները ևս բացառիկ հետաքրքրություն են ներկայացնում արվեստի պատմության ասպարեզում: Բուսական, երկրաչափական պատկերաբանողակներով ուշագրավ են Այգեհատի, Աթորու, Դսեղի, Արդվիի, Կողեսի, Կուրթանի, Հորարծու կոթողները: Այս խմբում ճարտարապետական հորինվածքով և բազմաժանր նրբաբանողակներով առանձնանում են Օծունի և Բրդաձորի կոթողները:

Դավանական որոշակի խնդիրների բերումով Գուգարքում ևս IV-VII դդ. թևավոր խաչեր են կանգնեցվում՝ պատկերելով առանձնապես խաչելության և փրկագործության մոտիվը (Կողբ, Սղարթ), որոնց կիրառությունը պաշտամունքային, թե մեմորիալ նպատակով շարունակվեց նաև հետագայում (Մեծավան, Աղեզի, Մարց, Բերդավան), որոնք երբեմն կրում են նաև հիշատակագրություններ (Յաղդան, Կողես, Սղարթ, Քոբայր):

Գուգարքի տնտեսական ու շինարարական առաջընթացը կասեցվեց արաբական տիրապետության ընթացքում: Ճիշտ է, կաթողիկոս Հովհան Օձնեցին իր անբասիր հեղինակությամբ, իմաստնությամբ և դիվանագիտական խոհեմությամբ որոշ գիշումներ կորզեց խալիֆից, սակայն Յուսուֆի ասպատակիչները 902 և 911 թթ. ոտնակոխ արեցին նաև Գուգարաց աշխարհը: Ու, չնայած սրան, այստեղ վիճակը համեմատաբար տանելի էր, և արաբ ոստիկանների կողմից հետապնդվող Սմբատ Ա թագավորն (890-914 թթ.) ու կաթողիկոս Հովհաննես Դրասխանակերտցին (898-929 թթ.) երբեմն ապաստանում էին Օծունում:

IX դարի կեսերին վերականգնված պետականությունն արագորեն խթանեց տնտեսության, առևտրի, արհեստների զարգացմանը, նպաստեց ազգային ոգու զարթոնքին, գիտության ու մշակույթի վերածնությանը: Վերընծյուղվեցին շինարարական ձեռնարկումները՝ հանդես բերելով ճարտարապետական ուշագրավ մտահղացումներ ու զարմանալի նորություններ (առանց հենասյուների հսկայական գմբեթակիր տաճարներ, գավիթներ, բազմահարկ կառույցներ, հարդարանքի ճոխ տարրեր և այլն):

Կարևոր է մի հանգամանք ևս:

Կանխվեց նախարարական տների ու նրանց հպատակների VIII դարում ահագնացած արտագաղթը կայսրություն, և ակտիվացավ տարագիր հայերի վերադարձը հայրենիք: Արտաքին շարժառիթները գերազնահատողների կարծիքով, դա միաբնակ հայերի նկատմամբ Բյուզանդիայում ցուցաբերվող հալածանքի հետևանքն էր: Մինչդեռ հզորա-

² Հատկապես ձեռագրագ հիշատակարաններում նահանգը պարբերաբար կրում է Գուգարք, Գուգարաց աշխարհ, Տայք, Տայոց տուն, Խոր Հայոց, Չորո գետ, Չորագավառ, Չորագետ, Տաշիր-Չորագետ, Լոռե, Լոռի, Լոռի-Փամբակ, Բորչալու, Սևորոյաց երկիր և այլ անուններ:

ցող Բագրատունյաց Հայաստանը անդիմադիր ծգում էր օտար երկրներում դեզերող հայերին, որոնց հիշողության ծալքերում տակավին չէր մարել հայրենիքի տենչը, և նրանք տուն դարձան՝ իրենց վրա կրելով *հռոմ* պիտակը, իսկ նրանց շինած աղոթարաններն էլ կոչվեցին Հռոմոս, Հռոմայր: Հռոմներին է վերագրվել անգամ Սանահինի վանքի հիմնադրումը:

Գուգարքում ստեղծվում է իրավական յուրովի վիճակ այն բանից հետո, երբ երկրի հյուսիսային սահմաններն ամրապնդելու նպատակով Աշոտ Ողորմածը իր որդի Գուրգենին (պատմագրության մեջ հայտնի Կյուրիկեին) 970-ական թվականներին նշանակում է երկրամասի կառավարիչ, իսկ եղբայր Սմբատ Տիեզերակալը (977-990 թթ.) հատուկ հրովարտակով նրան հռչակում է նահանգի ժառանգական թագավոր, Սանահինի վանքն էլ՝ եպիսկոպոսանիստ հոգևոր կենտրոն (979 թ.): Նորաստեղծ Կյուրիկյան թագավորությունը չհասավ Գուգարաց բղջիխության ընդարձակությանը, սակայն, ժամանակագրի վկայությամբ, «Գուրգեն տիրէ Գոգարացոց կողմանս սկսեալ ի Գագայ, Խառայ մինչեւ ի դուռն Տփղաց: Եւ վարեաց սա զամենայն ժամանակս թագաւորութեան իւրոյ յօքնապատիկ բարեպաշտութեամբ եւ անուանի եղեալ»:³

Կայուն և որոշակի սահմաններով կազմակերպված այս թագավորությունը նշանակալից հաջողության հասավ Դավիթ Անհողինի ավելի քան կեսդարյա տիրապետության ընթացքում (989-1048 թթ.): Կիրակոս Գանձակեցու և Վարդան Արևելցու պատմելով՝ նա մեծ հեղինակություն էր վայելում Անդրկովկասում, կանխում հաճախակի կրկնվող հարձակումները, ընդարձակում տիրույթների սահմանները Գանձակի ու Տփղիսի էմիրների գավթած հողերի հաշվին, իշխում Փառխոսի, Գարդմանի, Կողբի, Քուստքի, Ջավեի, Լոռի գավառների վրա, ամրացնում և բարեկարգում թագավորանիստ Շամշուղեն ու 12 այլ բերդեր:⁴

1040 թ. Աբուլսուար ամիրան «Դառնաշունչ բարկութեամբ մտաւ յաշխարհն Աղուանից ի գաւառն Դաթի Անհողին եւ բազում վիշտս էած հաւատացելոց»:⁵

Վտանգի ծանր հետևանքները քաջ գիտակցող պետական խոհեմ գործիչ Դավիթն արագորեն համախմբում է հայ-վրաց-աղվանական զորական ուժերը, դիմադարձ կանգնում թշնամուն և գլխովին ջախջախում նրա 150 հազարանոց բանակն ու ազատագրում գրաված հողերը:

Դավիթ Անհողինը որպես Բագրատունիների օրինական ժառանգորդ փորձեց պատվար կանգնել Հովհաննես-Սմբատի մահից հետո վտանգված Հայոց պետականությանը, այդպիսով նաև իր գերիշխանությունը տարածել Անիի թագավորության վրա: Բայց քաղաքական իրադրությունն աննպաստ էր նման ձեռնարկման հաջողության համար: Ու թեև «մերն դադարեաց թագաւորական գաւազանն», սակայն «գոյր ուրուք տէրութիւն, որպէս Կիրիկէին, որ ի Լոռէ քաղաք, և որ շուրջ զնովաւ», տարեգրում է պատմիչը:⁶

Հորը փոխարինած Կյուրիկէ Ա (1048-1089 թթ.), որը «այր բարեբարոյ և կատարեալի գործս առաքինութեան»,⁷ շարունակեց նրա որդեգրած քաղաքականությունը և մեծ

³ Սանր ժամանակագրություններ, հ. II, կազմեց Վ.Ս. Հակոբյան, Եր., 1956, էջ 501:

⁴ Հպարտուն պատմութեան Վարդանայ Վարդապետի լուսաբանեալ, Վենետիկ, 1862, էջ 106:

⁵ Սատրեոս Ուռհայեցի, ժամանակագրութիւն, Վաղարշապատ, 1898, էջ 79-80:

⁶ Կիրակոս Գանձակեցի, Պատմություն Հայոց, Եր., 1961, էջ 93:

⁷ Նույն տեղում, էջ 152:

ջանքեր գործադրեց՝ երկրի տնտեսական զարգացման ընթացքը ապահովելու և անբազմազան պետության ռազմական կարողությունները՝ Նա անբացքեց Լոռի բերդը, 1065 թ. այն դարձրեց Տաշիր-Չորագետի թագավորության մայրաքաղաքը, իսկ 1050 թ. կառուցեց Վարդաբլուր գյուղի ամրոցը: Այս ժամանակներից են նաև Կայծին, Ղանլիջաբար, գուցե և՛ Չախկալաբերդ ամրոցները՝ բոլորն էլ կառուցված ժամանակի ռազմական պահանջներին համապատասխան:

XI դարի կեսերին սկսված սելջուկյան արշավանքները 1064 թ. հասան Հայաստան: Ալփասլանի հրոսակների նվաճումներն ուղեկցվում էին կոտորածներով, թալանով, ավերածություններով, գերեվարությամբ և «ոչ ոք կարելի չէր պատմել զկատարածն դառնաշունչ աղետիցն հաւատացելոցն Քրիստոսի, վասն զի դառն ճաշակմամբ ընկալան զմահն ի կատաղեալ չարութոյն ազգէն քուրքաց»:¹⁵

Սակայն Ալփասլանը, նկատի ունենալով Լոռի բերդի ամրությունն ու Կյուրիկեի ռազմական ուժերը՝ վճռում է հարցերը լուծել դիվանագիտական ուղիով: Նա սյառգամավոր է ուղարկում «առ թագաւորն ... Կյուրիկէ եւ խնդրեաց զդուստրն իւր ի կնութիւն»: Թագավորը խոհեմաբար նախընտրում է խուսափել արյունահեղությունից եւ դաշն է կնքում գոհավարի հետ՝ բավարարելով նրա պահանջները, փրկելով երկիրն ու ժողովրդին:¹⁶

Երկրի անդորրն ապահովելու, կեղեքումները, հալածանքները, ապօրինությունները կանխելու նպատակով Կյուրիկեն վրաց թագավոր Գեորգի Բ (1072-1089 թթ.) և Հայոց կաթողիկոսի ուղեկցությամբ 1081 թ. մեկնում է Խորասան՝ Մելիք-Շահի (1072-1092 թթ.) մոտ, որտեղից նրանք «դարձան պատուով»:

Կյուրիկեի հաջորդներ Դավիթ Բ և Աբասը Լոռիի թագավորությունը վարում են կիսանկախ վիճակով, իսկ 1118 թ. հայ-վրացական միացյալ ուժերն իսպառ ազատագրում են երկրամասը, որն անցնում է գորահրամանատար Օրբելյաններին, իսկ 1188 թ. Լոռի-Տաշիրը ճանաչվում է ամիրսպասալար Սարգիս Չաքարյանի ժառանգական կալվածքը: Այս ընթացքում դեռևս գոյատևում էր Կյուրիկյան թագավորությունը՝ զրկված նախկին փառքից, տիրույթներից ու իրավունքներից: Մասնավորաբար ծանրակշիռ էր Կյուրիկե Բ (1145-1186 թթ.) դերը, որի աղջիկներից Ռուսուզանն ամուսնացած էր Իվանե Օրբելյանի, իսկ Մամբանը՝ Խաչենի իշխան Հասանի հետ:

Ակադեմիկոս Հակոբ Մանանդյանի դիտարկմամբ՝ «12-րդ դարում Տաշիր-Լոռին և Չորագետը խոշորագույն դեր կատարեցին հայկական կյանքում և նրանք դառան... Հայաստանի քաղաքական ու կուլտուրական վերածնության սիրտը»:¹⁶

Չաքարյանների գերակայությամբ հայկական ավատատիրական տների Օրբելյանների, Վահրամյանների, Արծրունիների, Մամիկոնյանների, Վաչուտյանների, Խաչենի իշխանների սերտ համագործակցությունը, խնամիական կապերը մեծապես նպաստեցին երկրի ամրապնդմանն ու բարգավաճմանը: Այդ դաշնակցությունը նպաստեց պետական միասնական քաղաքականության մշակմանն ու իրագործմանը, թշնամիների դեմ մղվող պայքարում ուժերի համախմբմանը, ներքին կարգուկանոնի, իրավական նորմերի, հարկապարտության միասնական դրվածքի հաստատմանը: Ողջ երկրում ծավալվեցին շինարարական բուռն աշխատանքներ, բացվեցին բարձրագույն դպրոցներ, արտադրական, առևտրական կենտրոններ: Ավարտվում են Սանահնի, Հաղբատի, Գագա Ս. Սարգ-

¹⁵ Մատթեոս Ռոտայնցի, էջ 145:

¹⁶ Նույն տեղում, էջ 144-146:

¹⁷ Հակոբ Մանանդյան, Երկեր, հ. 9, Եր., 1977, էջ 80:

սի, Հռոմայրի, Բարձրաքաշի, Խորակերտի, Քոբայրի, Ախթալայի, Հնեվանքի, Մշկավանքի շինարարությունները: Կառուցվում են Հաղբատի, Սանահնի, Ախթալայի, Քոբայրի կամարակապ քարաշեն սեղանատները, Կայան բերդը, Չախկալաբերդը, Լոռի բերդի, Յաղդանի, Կուրթանի, Չաղիծորի կամուրջները: Աներևակայելի նվաճումների հասավ Գուգարքի խաչքարագործությունը: Ձարդաքանդակի նրբությամբ ու ճոխությամբ, հյուսվածքների ներդաշնակությամբ ու միասնությամբ, թեմատիկ բազմազանությամբ այս ստեղծագործությունները բխում էին ժամանակի դավանական պահանջներից, վերածնության գաղափարների առկայծումներից: Միջնադարյան քարաքանդակ արվեստի անհասանելի երևույթներ են Սանահնի, Հաղբատի, Դսեղի, Մարցի, Մշկավանքի, Իգահատի, Դովեղի խաչելության, համբարձման, ավետման տեսարաններով խաչքարերը՝ կարևոր արձանագրություններով: Երկրի անդորրն ապահովում էին Օրբելյան, Կյուրիկյան, Ջաքարյան, Արծրունի փառապանգ զորավարները, իսկ մտավոր-գիտական միտքն առաջ էին մղում Հովհան Օձնեցին, Դիոսկորոսը, Հովհաննես Իմաստասերը, Հովսեփ Գիտնականը, Անանիա Սանահնեցին, Դավիթ Քոբայրեցին, Վարդան Արևելցին, Գրիգոր Տուտեորդին, Գրիգոր Աբասորդին և ուրիշ լայնախոհ գիտնականներ ու վարդապետներ:

Պատմության անիվը բեկվեց մոնղոլական լայնածավալ նվաճումների հետևանքով: 1236 թ. Չարմաղանի առաջապահ ջոկատը Չաղատա նոյինի (բյուրապետ) գլխավորությամբ նվաճեց Գուգարքը: Գանձակեցին հաղորդում է, որ զորապետը, հրապուրված Լոռի քաղաքում թաքցված անհամար հարստությունների մասին տարածված զրույցներով, պաշարում է բերդը, ավերում պարիսպները, ներխուժում ամրոց և դաժանորեն կոտորում տղամարդկանց, կանանց ու երեխաներին, ավարառում նրանց ունեցվածքը և Շահնշահ Ջաքարյանի գանձերը: Իսկ Կայան բերդում պատսպարված Ավագ Ջաքարյանը կամփին հանձնվում է նվաճողին՝ խուսափելով արյունահեղությունից: Եվ չնայած ստեղծված աննպաստ իրադրությանը, այնուամենայնիվ, հետագա կես դարում շարունակվում են տնտեսական ու մշակութային առաջընթացը, շինարարական ձեռնարկումները Մշկավանքում, Հաղբատում, Քոբայրում, Դսեղում: Վիճակը վատթարացավ այն բանից հետո, երբ Արղունի որդի Ղազան խանի ժամանակ (1295-1304 թթ.) մոնղոլներն ընդունեցին մահմեդականություն՝ հիմնովին փոխելով իրենց երբեմնի զիջողամիտ վերաբերմունքը նվաճված քրիստոնյա ժողովուրդների նկատմամբ: Իսկ թաթարական լայնածավալ պետության կործանումից հետո (1353 թ.) տիրող անիշխանության, թուրքական ցեղերի մրցակցության հետևանքով հետզհետե հյուծվում է նաև Գուգարքը:

1430 թ. Լենկ Թեմուրի որդի Շահռուխը գրավում է Տաշիր-Չորագետը և նրա կենտրոն՝ կիսավեր ու անպաշտպան Լոռի բերդը: Երկու տարի անց հայ-վրացական ուժերը ազատագրում են գավառը,¹¹ բայց այլևս երբեք կայուն վիճակ չի ստեղծվում:

Ծանրագույն այս ժամանակներում Լոռին կրկին անցնում է Օրբելյաններին: 1438 թ. Լոռու պարոն է հիշվում «մեծափառ եւ աստուածաշեն իշխանաց իշխան»¹² Բեշքենը՝ Բուրթել Օրբելյանի ժողը, որի մասին տեղեկացնում է նաև Լոռի բերդի մի խաչքարի արձանագրություն:

Չդադարող հարձակումներին դիմադարձ կանգնելու նպառակով թեև ամրացվում են Գուգարքի ռազմական կարևոր հանգույցները, այդ թվում Լոռի բերդը, սակայն 1469 թ.

¹¹ Լ.Ս. Սելիստե-Բեկ, Վրաց աղբյուրները Հայաստանի և հայերի մասին, հ. 9, եր., 1955, էջ 54:

¹² Ժե դարի հայերեն ձեռագրերի հիշատակարաններ, մասն Ա, կազմեց Լ.Ս. Խաչիկյան, եր., 1955, էջ 486:

թուրքերը գրավում են այն: Դսեղում գրված Ավետարանի հիշատակարանի համաձայն, 1491 թ. հայ-վրացական ուժերը ջախջախում են թուրքերին և ետ խլում ամրոցը:

1555 թ. թուրք-պարսկական պայմանագրով Լոռի-Փամբակում հաստատվում է պարսիկների գերիշխանությունը, բայց ամրոցը հաճախակի անցնում է ձեռքից-ձեռք, որով գավառի վրա հաստատվում է տվյալ պետության գերակայությունը: 1603 թ. Շահ Աբասը վերանվաճում է Լոռի-Փամբակը և այստեղ բնակեցնում թուրքական մի ցեղի, որի անունով գավառը վերակոչվում է Բորչալու: 1666 թ. դաշնագրով տարածքային սլաշկանելությունը մնում է անփոփոխ, սակայն այնուհետև շարունակվում են պարսկա-օսմանյան երկարամյա մրցակցությունը, ջալալիների ու լեզգիների ավարառությունները, որոնց հետևանքով սնանկանում է անպաշտպան ժողովուրդը: 1785 թ. Լոռի է ներխուժում Օմար խանի դադստանյան 20-հազարանոց բանակը, 1795 թ.՝ Աղա Մահմեդի զորքերը:

Վերջին դարերի անիշխանության, անտեղության հետևանքով նոսրանում է Գուգարքի բնակչությունը, դադարում են շինարարական աշխատանքները, ավերվում ու լքվում են հողերը կենտրոնները, իսկ եղած վիճագիր արձանագրություններն այլևս պատմական սակավ կարևորություն են ներկայացնում:

* * *

Գուգարքի հին և միջնադարյան հուշարձանների թիվն անցնում է 10 հազարից: Թեև անհամեմատ քիչ են վիճագիր արձանագրությունները, սակայն դրանք չափազանց կարևոր տեղեկություններ են պարունակում միջնադարյան Հայաստանի քաղաքական կացության, տնտեսական, սոցիալական, իրավական հարաբերությունների, Բագրատունյաց, Կյուրիկյան հարստությունների, Ջաքարյան, Արծրունյաց, Մամիկոնյան ավատական տների, ուշ դարերում այս տարածք ներթափանցած Շահնագարյանների ու մանր այլ իշխանապետությունների գործունեության մասին:

Առանձնահատուկ կարևորություն ունեն վարչակառավարչական համակարգի, հարկապարտության ղրվածքի, նվիրատուների և միաբանությունների պայմանագրությունների վերաբերյալ մեզ հասած վավերագրերը՝ որպիսի մի այլ սկզբնաղբյուր հազիվ թե կարելի է ակնկալել: Այս առումով ուշագրավ են *արզանի* մասին XIII-XIV դդ. Ջաքարյանների, Մամիկոնյանների կողմից գրանցված վիճագիր իրավավճիռները: Պարզվում է, որ հայ իշխանները պետական միասնական քաղաքականություն էին վարում՝ գյուղերի քայքայումը, բնակչության ընդվզումը, արտագաղթը կանխելու նպատակով այլևայլ հարկերի ու պարտագրերի հետ զիջելով այն ժամանակներում ևս բավականին ծանր համարվող ջրահարկը:

Գուգարքի վիճագրերը տեղագիր հեղինակների, հնասերների, բանասերների, պատմաբանների ուշադրությանն են արժանացել դեռևս XVII դարում, երբ Սանահնի և Հադրատի մի շարք արձանագրություններ մտցվել են «Քոթուկի» մեջ: Բազալտ քարի վրա փորագրված, բայց դարերի ընթացքում հողմահարվող վավերագրերի առաջին ժողովածուն կազմել է Հովհաննես Ղրիմեցին 1827 թ.: Այնուհետև հանդես եկան թեմական առաջնորդներ Սարգիս Ջալալյանցի, Սակար Բարխուդարյանցի, Քաջբերունու (Գաբրիել Հովհաննիսյան), Իսահակ Հարությունյանի, Ռոստոմ բեկ Երզնկյանի, Երվանդ Լա-

լայանի, Գյուտ Աղանյանցի և այլոց գրքերը, հողվածներն ու նոթագրությունները: Այս հեղինակների հիմնական թերությունն այն է, որ նրանք բնագրերը արտագրել են անփութ, հատուկ ընտրությամբ, ունեն բացթողումներ, աղավաղումներ, հավելումներ ու կրճատումներ, տպարանային ազատ շարվածքով հրատարակված բնագրերը չունեն լուսանկարներ, գրչագրեր, անտեսված են կցագրերը, համառոտագրության նշանները, և հնարավոր չէ երկմտության դեպքում ստուգել նրանց համապատասխանությունը բնագրերի հետ:

Սակայն դժվարին ու կարևոր գործ էր սկսված:

Իրերի բերումով Գուգարքի վիմագրերից հրատարակել են նաև Լևոն Սելիքսեթ-Բեկը, Գարեգին Յովսեփյանը, Սեդրակ Բարխուդարյանը, Սուրեն Ավագյանը, Գեղամ Սարգսյանը, Լավրենտի Բարսեղյանը, Արամ Քալանթարյանը, Աբրահամ Շահինյանը, Գրիգոր Կարախանյանը, Ալեքսանդր Մանուչարյանը և այլք:

Գուգարքի վիմագրական հսկայական ժառանգության գիտական լիարժեք ուսումնասիրության դրոշակակիրը անվանի հնագետ-պատմաբան, պրոֆեսոր Կարո Ղաֆադարյանն է: Սանահնի և Հաղբատի վանքերին նվիրված նրա ծանրակշիռ մենագրությունները՝ նյութի ընդգրկումով, սպառիչ վերծանություններով, պատմաքննական մեկնաբանություններով, ճարտարապետական վերլուծություններով, մնում են անմրցակից:

Հայագիտության ասպարեզում հայտնի է Կարապետ Կոստանյանցի կազմած «Վիմական տարեգիր» ժողովածուն (Ս. Պետերբուրգ, 1913)՝ նյութերը քաղված մինչև այդ եղած հրատարակություններից, շատ դեպքերում՝ անհարկի միջամտություններով, կրճատումներով ու սրբագրումներով, բայց՝ գնահատելի իբրև հայ վիմագրության «Դիվանի» առաջին փորձ:

Համանման մի հավաքածու էլ կազմել է Մխիթարյան ուխտի անդամ, դոկտոր Հ. Ոսկյանը («Գուգարքի վանքերը», Վիեննա, 1960): Նա անտեղյակ է Հայոց վանքեր տանող ճանապարհներից և տեղեկատվությունները հավաքել է Ջալալյանցի, Լալայանի, Յովսեփյանի, Ղաֆադարյանի, Սարգսյանի աշխատություններից, հայագիտական հանդեսներից, ուստի անփոփոխ, առանց որևէ մեկնաբանության արտագրված նյութերը գիտական արժեք չեն ներկայացնում:

Գուգարքում կան նաև այլալեզու՝ հունարեն, արաբերեն, ռուսերեն արձանագրություններ: Մեծ թիվ են կազմում և պատմական որոշակի կարևորություն ունեն վրացական վիմագրերը: Նկատենք, որ Հայաստանում գոյություն ունեցող վրացերեն վիմագրերի գերակշիռ մասը գտնվում է Լոռիում (Քոբայր, Յենվանք, Ախթալա և այլն): Պրանք խնամքով ժողովել և գիտական հավաստիությամբ վերծանել, մեկնաբանել է Պարույր Մուրադյանը: Այս կարևոր սկզբնաղբյուրից օգտվող հայագետների գործը դյուրացնելու նպատակով՝ նա դրանք հմտորեն թարգմանել է հայերեն:

«Դիվան հայ վիմագրության» սույն պրակում ամփոփված են Հայաստանի հյուսիսարևմտյան երկրամասի՝ պատմական Գուգարաց աշխարհի, ներկա Լոռու մարզի Թումանյանի, Գուգարքի, Սպիտակի, Ստեփանավանի, Տաշիրի և Տավուշի մարզի Նոյեմբերյանի ենթաշրջանների ճարտարապետական շինությունների որմերի ու հուշարարական կոթողների (խաչքարեր, տապանաքարեր) արձանագրությունները: Պրանցից հնագույնները VI դարից մեզ հասած պատառիկներ են (Օծուն, Արջովիտ, Կողբ), իսկ հոծ խմբերը վերաբերում են X-XIV դարերին:

Պրակը կազմված է ՀՀ ԳԱԱ հնագիտության և ազգագրության ինստիտուտի վիմա-

գրության բաժնում: Նյութերը ժողովվել են մեծ երախտավոր Սեդրակ Բարխուդարյանի ղեկավարությամբ 1965-1967թթ. կազմակերպված արշավախմբերի ջանքերով, որոնց ծանուակցել են Ս. Ավագյանը, Գր. Գրիգորյանը, Ա. Շահինյանը, Ալ. Մանուչարյանը: Ս. Բարխուդարյանի մահվան պատճառով անավարտ մնացած գործը ամբողջացնելու նպատակով 1976-1978, 1998-1999թթ. բաժնի աշխատակիցներ Ալ. Մանուչարյանը, Գր. Գրիգորյանը, Գ. Սարգսյանը, Աշ. Մանուչարյանը և Ռ. Գասպարյանը վերստին շրջել են տվյալ շրջաններում, համալրել և ճշգրտել մի շարք արձանագրություններ:

Սանահինի և Հադրատի վիմական արձանագրությունները ներմուծվել են պրոֆեսոր Կարո Դաֆադարյանի մենագրություններից՝ դրանք համապատասխանեցնելով «Դիվանի» սկզբունքներին, իսկ կատարված որոշ միջամտությունները, լրացումները նշված են ըստ հարկի:

«Դրակում» ընդգրկված են վիմագիր տեքստեր, որոնք բանասիրությանն են ներկայացվում առաջին անգամ:

«Դրակում» ղեկավարված լուսանկարները կատարել են Արտաշես Վրույրը և Ալ. Մանուչարյանը, իսկ գրչագիր ընդօրինակությունները՝ Ն. Խանգադյանը, Լ. Ավագյանը և Գ. Սարգսյանը:

Բազմաթիվ լուսանկարներ տրամադրել է Ս. Սաղունյանը, մի քանիսը՝ Ա. Քալանթարյանը (խմբ.):